

主 編 卞 甫

副 主 編 陳玉宇

明代基本史料叢刊·文集卷
(第二輯)

『洪武、建文朝』

四二

綫裝書局

欽定四庫全書

集部六

白雲集

別集類五明

提要

臣等謹案白雲集七卷明唐桂芳撰桂芳一名仲字仲實號白雲又號三峯歙縣人教授元之第五子少從洪焱祖學弱冠為明道書院司訓元至正中用薦授建寧路崇安縣教諭再任南雄路學正以憂歸明太祖定徽州

召對稱旨命之仕以瞽廢辭尋擢紫陽書院
山長卒年七十有三此集在程敏政所編唐
氏三先生集中廬陵鍾晦撰桂芳行狀稱其
文一以氣為主今觀集中有與陳浩書稱嘗
慕蘇老泉閉戶探賾古今上下融液胸臆故
下筆源源而無艱險窘迫態輒謂文不可學
而能氣可以養而致此蘇老泉傳法也蓋其
平生宗旨如此故所作容與逶迤絕無聲牙

晦澁之習詩亦清諧婉麗頗合雅音嘗自稱
酒狂先生門人呂旭為作傳黃季倫為作歌
集中重修興安府孔子廟記稱龍鳳元年大
丞相統軍下太平克應天六年冬僉事黃公
行郡興安重建府學又贈汪德元序稱大丞
相吳國公又黃憲僉唱酬詩序稱大丞相位
冢宰之明年案龍鳳乃韓林兒年號大丞相
即明太祖蓋明興時實假偽宋號令故用其

紀年徽州改興安府在丁酉年見地理志其
為冢宰事則明史不載蓋必林兒所加官而
其後諱之此亦可以証史也乾隆四十三年
五月恭校上

總纂官臣紀昀臣陸錫熊臣孫士毅

總校官臣陸費輝

白雲集原序

夫六經皆文也獨進學解曰春秋謹嚴易奇而法謹嚴
尚能知之奇而法非知道者孰能言之易曰日中見斗
有其象而無其理也載鬼一車無其象而有其理也易
雖奇而貴於有法所以為經三代而降莊騷非不奇也
而昧於有法荀揚非不謹也而失於有嚴唐推韓退之
奇而且法柳子厚謹而且嚴宋歐陽永叔正則正矣而
近於奇曾子固謹則謹矣而近於嚴陳腐則不奇詭怪

則不法放恣則不謹齷齪則不嚴戛戛乎其難矣所以
諛辭淫辭邪辭遁辭而知其所蔽所陷所離所窮豈特
言哉言之精者為文文之精者為詩初無異理也予幼
承過庭之訓其未出鄉里師授洪杏庭先生陳定宇先
生胡雲峯先生既游江湖請業錢水村先生龔子敬先
生方攻舉子聲律之學而未暇慕於古文也寓金陵而
任閩南教官垂二十年重罹兵燹曰詩曰文舊藁放矣
譬猶鏤冰刻楮畧無愛惜壬辰以後次兒文鳳編錄庚

子以來諸生吳匯裒輯甲寅予不幸盲廢王公貴人與
賢士大夫日過其門諉以文字潛驅默運如繹蠶緒筆
懸萬言誰其念之第四男文奎拜而請曰庚戌徙居城
闔明年長兄文虎以茂才薦銓江安縣丞西蜀崎嶇萬
餘里契闊四五載憂愁憔悴每形顏面然於文字雖寢
食顛沛未嘗棄于懷所謂窮而後專專而後工也文奎
收而拾之一一繕寫非敢傳於他人庶子孫謹藏篋笥
耳予笑曰文章公器不為子孫賢愚而傳與否也退之

之子杲誤金根之讀子厚之子周六幼甚其文盛傳初
不係其子也縱子孫不傳而人自傳之詩文不貴乎多
陳無已僅有思亭記黃樓銘咸知其能文也廬仝之月
蝕劉义之冰柱雪車盡知其能詩也予平生讀書不多
識字可數文不堪傳遠姑以文營文塚風氣融結待鍾
芝蘭詩付詩瓢魚龍咀嚼可鼓波濤明邦家之禎祥承
江海之利涉後世指而告曰文塚者劉蛻也詩瓢者唐
求也疵賤姓名未致泯滅而詩卷當長留天地間也輒

以文章之利病諸子之得失而深告之文奎頗聰明有志于學更宜勉旃洪武九年歲次丙辰五月五日白雲翁唐仲自序

傳曰言之不文何以行遠甚矣乎文之足以行遠也日月星辰天之文也山河草木地之文也禮樂刑政威儀文辭人之文也六經出於聖人制作又得聖人爲之釐正而論列焉千載之下不敢以文目之蓋理勝於文故也漢之司馬遷相如揚雄唐之韓愈柳宗元宋之歐陽

修王安石曾鞏蘇軾屹為一代宗匠未嘗舍文以傳苟
因事以明理第人品有高下學術有淺深豈離理據事
局局然可為文哉新安文公闕里即魯之洙泗也仲實
生於其鄉耳濡目染漸摩浸漬固有異於人者當時仲
實之曾翁大鈞軒先生以文章行義為士軌式微辭與
義過庭之訓甚富甫弱冠遊吳師授錢公水村龔公子
敬而鄭君明德陳君子貞蔣君子中皆折輩行與之交
二十八僞金陵李公晉仲李公五峰丁公仲容一見器

重其詩五七言歌行雜體聯成巨帙動盪揮霍光芒音
韻已沾沾錫人齒頰三十有七任閩南教官尋聘烏克
遜平章家塾枯坐閨寥度無可努力繙閱經典史籍適
有遺翰林侍講虞公道園集一編仲實伏而攻之日夜
不寐從容法度心領神會雖不獲造堂瞻歲殆私淑艾
者自是研精務極其旨趣理融事覈洗濯鍛鍊卓然自
成一家之文山鏡石刻學士大夫抄寫不停手無何干
戈擾動文字散失所存十百於一二題曰白雲集畧仲

實嗣子文虎詒書江上請予序之嗚呼學之難成而時之不偶如此使仲實抱負不凡遭時承平而不罹於濁亂則典謨雅頌施諸朝廷薦之郊廟必可媲美於道園集矣顧乃遭回困躓與俗浮沈岐山之鳳不咏於詩西狩之麟僅紀於春秋嗚呼悲夫壬寅夏行郡新安幸與仲實接精神堅悍雄談娓娓其文氣逼人不敢迫視今以疵賤姓名得挂於集畧豈非疇昔之願也哉仲實名桂芳姓唐氏其行次仕宦言行之詳不系於文者茲不

著癸卯秋七月三洲陳浩養吾敘

欽定四庫全書

白雲集卷一

明 唐桂芳撰

五言古詩

和鄭士恒所寄佳什

窮居寡塵鞅遇物殊欣欣偶然坐石上得見迴溪雲
春風一披拂落花急紛紛茅簷僅容膝父老三四人間談
雜笑傲庶以忘憂勤